



Conrad-i Garo Hills nung NPP
candidate atema nüboyimtsür

Dubai yimsüsür
Sheikh Hamdan süogo

VOL. XVIII NO. 160 (ADOK 160) DIMAPUR

YANGTEPNÜ (THURSDAY)

METSÜREMI (MARCH) 25, 2021

₹ 5.00

Election dak rangloker Centre-i totzü jenjang tera ajemogo

Guwahati, March 24 (Agencies): Assam aser tanga State pezü nung Assembly election agitsü aliba nung rangloker Centre-i küm ka tema nung tang mezüing atema petrol aser diesel jenjang aluogo.

State Assembly election jakdang aser ano nisungtemi petrol o diesel nung jenjang kanga atuba atema ola adokba mapang ka nung BJP-i aniba Centre sorkari Assam aser tanga state kar nung totzü jenjang nung poisa ishika ajemogo.

Centre-i petrol litre nung poisa 18 aser diesel nung poisa 17 ajemogo.

Küm ka shi totzü jenjang

tutet atuba sülen Centre sorkari tang mezüing atema jenjang ajemogo. March 16, 2020 nü totzü jenjang ajemba sülenbo khen danga majemi aru.

Alima nung crude oil jenjang ajemaka, tesüiba küm ka tsüingda India nung petrol litre nung Rs 21.58 aser diesel litre nung Rs 19.18 tashi ajungketogo.

Taküm February ita Rajasthan, Maharashtra aser Madhya Pradesh nung totzü jenjang tasaktiba aküm. Ajsüaka, West Bengal, Assam, Tamil Nadu aser Kerala nung election agitsü osang sangoktsüba sülen totzü jenjang memelenshi dang mapang tatsüka ka aruogo.

COVID-19 Nagaland: Nisung ka dak putet

Kohima, March 24 (TYO): Nagaland nung anogo 10 tashi nisung shinga dak-a COVID meputeti arur Bodbarnü nisung ka dak putetogo.

"Dimapur nung nisung ka dak COVID-19 aliba putet. Külen, Mokokchung nung nisung ka taneptsü nguogo" ta Health & Family Welfare Minister, S Pangnyu Phom-i metetdaksü.

"Nisung 12,226 rongnung 11,979 taneptsü nguogo. Nagaland nung COVID-19 nungi taneptsü angubaji 97.98% lir" ta Health & Family Welfare Director, Dr Denis Hangsing-i metetdaksü.

Nagaland nung COVID-19 puteter nisung 91 asüba nungi parnok 10 bo tanga timtem ajanga asü. Nisung 154 tashi tanga state temi ogo, ta paisa ashi.

Tang anepalurtemji Kohima aser Dimapur nung nisung kaka lir aser tenaprong dak shirangba yimya mali, ta Dr Hangsing-isa shisem.

Nagaland nung COVID-19

alitsü akok ta temolung melemi bilemba sample 1,35,549 tendangogo. RT-PCR ajanga 75,324, TrueNat ajanga 37,512 aser Rapid Antigen Test ajanga 22,713 tendang, ta paisa metetdaksü.

Nagaland nung nisung 56,739 nem Covid vaccine agütsüogo:

Nagaland nung nisung 56,500 dak tema nem COVID-19 vaccination (Covishield) agütsüogo.

Mongulbar tashi nung nisung 56,739 nem COVID vaccine dose 76,682 agütsüogo, ta State Immunization Officer Dr Ritu Thurr-i metetdaksü.

Nisung 56,739 rongnung frontline workers 35,345, healthcare workers 11,810, teintet rogo 7,734 aser arishi küm 45 ser temapur 1,850 lir, ta paisa ashi.

Healthcare workers 7,737 aser frontline workers 12,206-i COVID-19 vaccine dose anaprong agiogo, ta Dr Thurr-isa ashi.

Zeliang nunger tepsetba atema tejashi sayutsü: TUD

Dimapur, March 24 (TYO): Zeliang nunger tai maketba nisung asem tepsetba magizüker aser parnok pusemer ta sayutsü atema March 25, 2021 anepdang 7:00 ako nung Hoho, Unit aser züngsem ajak dang JCB showroom, 7th Mile anasa petrol pump nung adenshitsü mepishir, ta Tenyimi Union Dimapur (TUD)-i sangdong

ka nung metetdaksüogo.

"March 24, 2021 nü TUD Complex nung rongdak sanen luden senden amendang iba telemtetba agiogo. Anungji TUD züngsem ajaki sobaliba sübotsü sübor arutsü tetuyuba agütsür. Onoki temeten bushiba mapa nung tangatetba shitak aliba senso ajak teyari aginür," ta President Hilo Semp-i ashi.

Peren DC-i curfew ozüing agütsür; Nagaland sorkari SIT tentetogo

Dimapur, March 24 (TYO): Bodbarnü Peren deputy commissioner Sentiwapang Aier-i Peren district kübok lendong atalokba tesem nung Section 144 CrPC ozüing alitsü metetdaksüogo.

"Mhainamtsi (Kohima-Dimapur) Junction nungi Mhainamtsi Police Check Gate nungi Dimapur District den arrtsüa aliba Heningkunglwa Police Check Gate tashi nisung 5 dak tema madenshitsü aser prangpong mesüra yirutsüa

osettem bener mesenzütsü," ta Peren DC-i sangdong ka nung ashi.

March 23, 2021 aonung 9:00 ako nungi tenzüker curfew tenzükogo aser tanga tetuyuba ka magütsü tashi iba ozüing alitsü, ta DC Sentiwapang Aier-isa metetdaksü.

Hombarnü Peren district kübok Lamhainamti nung nisung asem tepsetba ken o bushisingdangtsü atema Nagaland Police-i Special Investigation Team (SIT) ka tentetogo.

Iba osang ya Deputy chief minister aser Home Minister, Y Patton-i Mongulbarnü metetdaksü.

"State sorkari iba tatalokba süoki ia bilemer aser ozüingi melaba ama mapa inyaksü. Aibelener nem tapet temerenshi agütsütsü," ta Y Patton-isa ashi.

Hombar anüngdang Lamhainamti tesem nung nisung asem tepsetba sülen tensa mejungi küma lir. Iba tesem nungsa gari ana rongdoktsür liasü.

Kohima nung Regional SARAS Fair tenzükogo



March 24, 2021 nü Kohima local ground nung Advisor Dr Neikiesalie Nicky Kire aser tangartem Regional SARAS Fair nung agiba noksa angur. (Kohima, March 24)

Kohima, March 24 (TYO): Kohima nung anogo ti atema Regional Sale of Articles of Rural Artisans Society (SARAS) Fair 2021 tenzükogo.

Iba sentong ya Kohima Local Ground nung Department of Rural Development kübok Nagaland State Rural Livelihoods Mission (NSRLM)-i ayongzüker.

Iba fair ya Nagaland nung tetsür Self Help Groups (SHGs) yaritsü aser tesem ka nung adenshir shishilembaba akangshitsü atema ayongzüka amonger.

March 31, 2021 tashi Khouchiezie (Kohima Local Ground) nung anepdang 9:00 ako nungi nikongdang 5:00 ako tashi district 11 nungi SHG temi stall 24 lapoka amentsü.

SARAS Fair ya Union Ministry

of Rural Development-i tenzüka lir aser iba ya yimtsüngtem nung yanglutetba products ajungkettsü aser SHGs tashi itdaksütsü atema nükjidong lir.

Nagaland nung rural aser small scale sectors atema teinyaktsü aika lir saka tetsükdaksü kaji products yokdoktsü atema shishilembadak tajung maliba lir, ta NSRLM-i sangdong ka nung metetdaksü.

Bodbarnü Urban Development & Municipal Affairs Advisor, Dr. Neikiesalie Kire-i SARAS Fair 2021 tenzüksü.

Iba mapang pai district balala nungi Self Help Groups (SHGs) dang kati ka nungi angazüktsü aser mapa tajung ajizüktepa inyakttsü ayongzüker.

"Nenoki asen tesem nung balaka yanglutetba products

ajungkettsü merangang. COVID-19 wara tajungba akümba ajanga tarutsü anogotem SHGs talilai shilem agitsü imlar" ta Dr. Kire-isa metetdaksü.

Iba Fair ya local artisans, SHGs külemi sabang ka nung adenshitsü aser nisung timba dang products yokdoktsü atema lir, ta Mission Director, NSRLM, Imtinenla-ia ashi.

COVID-19 wara ajanga shishilembar tilatem kanga mejungi kongshiogo saka SOPs agienba ajanga SARAS Fair ayongzüka amonger, ta laisa metetdaksü.

"District 11 nungi SHGs ananai iba Fair nung shilem agidar aser taruba SARAS Fair nunbo Noklak district nungi SHGs-i shilem agitsü imlar" ta Imtinenla-isa ashi.

NPF, DALT aser TPO teloktemi khukhua aitsür

Dimapur, March 24 (TYO): March 22, 2021 nikongdang Peren district kübok Lamhainamdi yimtsüng nung Zeliang nunger asem tepsetba khukhua aitsür, ta Naga People's Front (NPF), Dimapur Ao Lanur Telongjem (DALT) aser Tenyimi Peoples' Organisation (TPO)

teloktemi sangdong balala ajanga metetdaksüogo.

Taochi melii tai maketba nisungtem tepsetba ya loktiliba nung magizüker aser nisung tepsetertem merenshitsüla ta Press Bureau, NPF sangdong ka nung ashi.

Tesüiba anogo ishika iba tesem

nung tensa mejungi liasü ta osang angazüker, anungji PDA sorkari nendaka aser tenük yoka ali asübaji iba lendong ya matalokla. Naga nunger mapang tamajung ka nung alir aser asenok asen lima nung lendong nungi jenbua mali, ta parnokisa metetdaksü.

(Maneni tapak 2 nungi...)

Mokokchung aser Phek nung World TB Day 2021 mungogo



National T.B Elimination Programme and World T.B Day sentong nung DC Phek, Razouvolie Dozo-i jembidang tangokba noksa nung angur.

Dimapur, Metsüremi/March 24 (TYO): Chief Medical Officer Office, Mokokchung nung aliba IDSP Conference Hall nung March 24, 2021 nü National Tuberculosis Elimination Programme (NTEP) aser World TB Day 2021 munga liasü.

Iba sentong nung Dr. Kibangkumba, Deputy Chief Medical Officer, Mokokchung menden liasü, shibai sentong nung adener pela agizükba den iba anogomung indang rateta ashi.

Dr. Toshila, Senior Medical Officer, Chest disease & TB Hospital, Mokokchung ajanga "The Clock is ticking" omen nung ajemdaker jembai aser TB tashidak tatem kati arudaktsüsü asoshi inyaktüsü atema alima nung mapang mali kumdar, koba India nung menatepa aoba tashi tulutiba lir, ta ashi.

Sentong nung Dharam Raj,

SDO (Civil) ajanga jembiba mapang, TB ya züba-züba magizüksüla saka aneptsü akokba tashidak ya samadaktsüsü asoshi mera agitsüla, ta ashi. Tang COVID-19 tashidak tetsübutüsü indanga pai jembai aser iba tashidak azüoktsü asoshi mozü aser facility peria alidang tangatetba tajung nung inyaktüsü asen mapa lir, ta ayongzük.

Iba anogomung nung Akumnaro aser Talijungla nati TB tashidak nungi taneptsü anguba indang kuli agüja liasü.

Phek jila kübok Clock Tower nunga 'The Clock is Ticking' omen nung ajemdaker March 24, 2021 nü National T.B Elimination Programme aser World TB Day sentong agia liasü, kong Razouvolie Dozo, Deputy Commissioner Phek ya tetushi temsendanger ka ama dena liasü.

Tuberculosis ya aneptsü

akokba tashidak ka süaka akokba mera ajak agia iba tashidak den raratsü nüngdaker, ta tetushi tesendangeri ashi aser sentong nung adener dang iba tashidak indang awareness prokshitsü ayongzüka liasü.

Iba sentong nung menden ya DTO, Dr. Ruokuohelie Rutsa liasü aser DNO/NTCP Dr. Nichukholie Vupru ajanga tarur pela agizükba o jembia liasü.

Maneni Sr. PMDT, Vezotalu Shijoh ajanga tetushi aser tenüsang agütsüba sentong agi aser CMO, Phek Dr. Vibeitunuo Mepfuo ajanga iba anogomung teratet indang jembia liasü.

Sentong nung TB tashidak nungi taneptsü ngur alir Vepahu Khamo-i takum kuli ashi, District M & E Asst, Velato Nienu ajanga temeja ken ka aten aser DPO, DAPCU, Kuduvo Kezo ajanga tepela ankep o jembia liasü.

Kohimakübok Govt. Acquired Area nung ali ayoktsü/alitsü memelar

Kohima, March 24 (TYO): Kohima DC, Gregory Thejawelie, NCS-i sangdong ka ajanga nüburtem dang, sorkar li atsünga agir ayokba aser alizüktepba osang aika lir, saka item liji public nem service balala agütsüsü atema project balala inyaktüsü aliba li lir, ta metetdaksü.

Sorkari tim ali kiburtem temeden kümzüka ayutsü atema inyaker, ajisüaka sorkar li/ sorkar Quarters atsünga agibabo magizüktettsü; Nagaland Eviction of Persons

in Unauthorised Occupation of Public Land Act 1971 kübok Arrla 5 (1) aser 6 (1) nung aliba ama inyaktüsü; item rongnung notice agütsüba aser mindokba densema lir, iba denji külemi ozüng alema li atsünga agirtembo tepuokdak-a ayutsü aser senchi-a achitsü, ta sangdong nung shia lir.

Government Acquired Area aser 1934-35 Map of British conquered area kübok ali ayokba mesüra aliba nung aibelenra tayoker aser talir

naprongla na nem ozüng kübok tapet temerenshi agütsüsü, anungji nija mesüra telok kari Kohima Town aser telongtet aser Government acquired areas talisa New Secretariat/ Thizama aser Lerie area nung ali alitsü bilema lira mezüngbuba nung Deputy Commissioner Office nungi 'clearance' meshitsüla; yamaji meinyakra talir aser tayoker napronglai timtem ajurutsü aser ozüng kübok tapet temerenshi angutsü, ta kasa sangdong ajanga metetdaksü.

NPF, DALT aser TPO teloktemi...

State sorkari iba lendong bushisüngdangtsü atema Special Investigation Team (SIT) tentetba pelaa agizüker aser sorkari mapang latettsü akhanger. Latettsüba mapang tsüngda ken o bushisüngdang metemra Home Minister-i mapa nungi anentsüla, ta NPF-isa metetdaksüogo.

PDA sorkari Nagaland nung nisung tepsetba, tashiyim agi sen saruba, ochimashi inyakba aser tanga ozüng alema mapa inyakbatem memetet. Ajisüaka, sorkari kati nübortem nem security aser temeten agütsüsüla, ta NPF-isa ashi.

NPF-isa tasür kibongtem den asükhu lemsatepba aser asürtem tanüla anisüngzük ngudakjang ta sarasademtsüba metetdaksüogo.

DALT: Dimapur Ao Lanur

Telongjem (DALT)-ia tanga sangdong ka nung Lamhainamdi yimtsüng nung nisung asem tepsetba aser kiojen rongdoktsüba khukhua aitsür ta metetdaksüogo.

Ozüng amertermi tekaratiba kiralongrartem aputsü aser tarutsü nung iba mesükba mapa inyakba noktangtsü atema ozüng tapet agi merenshitsü akhanger, ta Media Cell, DALT sangdong nung ashi.

"Onoki asür kibongtem dang mangyim tejashi lemsatepba metetdaksür aser Tsüngremi nenok molung sünepjangma. Onokisa state sorkar dang iba tensa azüoktsü aser tekaratiba nung temeten agütsüsü mepishir" ta parnokisa metetdaksüogo.

TPO: Tenyimi Peoples'

(Tapak 1 nungi...)

Organisation (TPO)-ia sangdong ka nung Tenyimi nung asem tepsetba khukhua aitsür ta metetdaksüogo.

Nisung kari tangatetba tamajung nung pei ajangzüksü atema iba ya inyak ta kuli sayur. Shia meteterem aliba loktiliba ka nung iba ama inyakyim magizüker aser tangatetba shitak alirtem, civil society tem mesüra linük atema inyakba telok ajaki aitsüsüla, ta TPO-i metetdaksü.

"Ozüng amertermi nisung tepseterem jangjatsüla aser ozüngi melaba ama merenshitsüla. Tasür kibong aser kinungertem, Lamhainamdi yimtsüng aser Zeliangrong nung den onok dena lir," ta President Timikha Koza aser Gen. Secy. Vipopal Kintso nati sangdong nung ashi.

PIB Kohima-i Anganwadi worker atema Poshan Abhiyan webinar ayongzük

Dimapur, Metsüremi/March 24 (TYO): Press Information Bureau (PIB) Kohima den Ministry of Information & Broadcasting kübok Field Outreach Bureau (FOB) Kohima lungjemer March 24, 2021 nü Poshan Abhiyan nung webinar ka ayongzüka liasü. Iba webinar sendong nung Nagaland tesem balala nung aliba Anganwadi worker, osangbener aser nursing student temi shilem tajung agia kanga longsoa dena liasü.

Sentong nung S N Pradhan, ADG PIB North East Zone ajanga iba sentong indang teratet shia liasü. Pai ashiba agi, Ministry of Women & Child Development ajanga Poshan Pakhwada ya March 16 nungi March 31 tashi amunger.

Poshan Abhiyan ya Ato Kilonser Narendra Modi-i 2018 küm March 8 nü tenzüksü aser tangbo iba sentong nung nisung aikati shilem agir, aser Ato Kilonseri "Mann Ki Baat" indang sentong balala nung nüburtem ayongzükba ajanga Jan Andalon nung ajemdaker nüburtemi nutrition indang tali metetjema aor, ta Pradhan-i ashi.

Shisalen sayur ka ama jembiba mapang Soren Kikon, Joint Project Coordinator, Poshan Abhiyan, Nagaland Chapter ajanga ashiba agi, Poshan Abhiyan ya 2022 tashinung India ya malnutrition free kumdaktsüsü nükjidong yur tenzükba multi-ministerial convergence mission ka lir.

Mashisa aliba tetsür, nubentsür aser tanurtem nem chiyongtsü teperi agütsüsü aser temang ajunga nung terenlok lidaktsüsü nükjidong nung iba sentong ya tenzük.

Iba mission indang nükjidong ya tanurtem temang timi aiba nokdangba ajemdaktsüsü, arishi küm 0-6 tsüngta taurtem temang nung teyari agütsüba chiyongtsütem peria agütsüsü, tanurtem, tetsür aser teinlonglong tetsürtem anemia nungi kumzüksü aser Low Birth Weight (LBW) ajemdaktsüsü lir, ta Soren-i ashi.

Tajangzük angutem metettsü, Infantometer, Stadiometer, Weighing Scale (kinü tanur), Weighing Scale (tetsü & kinü tanur) amala Growth Monitoring Devices asoshi Anganwadi worker ajak (3,980) nem smart phone agütsüogo. Kasa mapang state

aser central level Dashboards ajanga frontline worker inyaksangshi repranger, ta pai ashi.

State nungi AAAA+LS team anati National POSHAN Abhiyaan Awards 2019 nung National Convergence Award ngua liasü. Iba mesükba team ter nem State Level Convergence Award agütsü. State nung Nutri-Gardens 240 yanglua lir aser tangbo Anganwadi Centre ajunga nung Nutri-Gardens alitsü, ta ashi.

Shisalen sayur ka ama "Child Nutrition" onük nung ajemdaker jembiba mapang Y C Chang, Consultant, Health & Nutrition ajanga ashiba agi, state nung tetsür aser tanurtem overall health status nung terenlok aliba jangja jangja ajiteter.

Tesüiba küm ter tsüngta state nung mashisa aser tanur asoba mapang anepaluba, tanur sozüker anepaluba, tanur ajak nem mama yongdaktsüba, tanur nem mozü agütsüba aser vitamin A supplementation & ante natal care tsütsü terenlok aliba angur.

National Family Health Survey ajanga bushitetba agi, state nung Infant Mortality Rate ya NFHS-4 (2015-16) nung shilem 29.5 liasü aser NFHS-5 (2019-20) nung shilem 23.4 lir, ta pai ashi.

Ajisüaka tanur ka temang sadema mainba asoshi state nung teinyaktsü lir, aser malnutrition ya taka-tait kibong nunga adoker, kechiaser temo aliba chiyongtsü tali achir, anungji nutria-gareden nung temolung agütsüsüla aser nüburtem nem chiyongtsü tajung indang tali angatetdaksüsüla, ta Chang-isa ashi.

K Sonikumar Singh, Assistant Director, PIB Kohima ajanga sentong nung adener pela agizükba o jembiba mapang, Ministry den lungjemer awareness campaign ayongzükba asoshi Director, Social welfare Department, K. Atoli Sema aser Nursing School Kohima dang pelaba lemsatepa liasü.

Iba webinar nung state kübok district, block, sub-division aser yimtsüngtem nung aliba Anganwadi worker, nursing students aser tesayurtem, osangbener aser northeastern state nungi Ministry of Information & Broadcasting nung ketdangsürtem dena liasü.

DTCC Kohima ajanga enforcement drive ayongzük

Dimapur, Metsüremi/March 24 (TYO): District Tobacco Control Cell Kohima, North Police Station aser South Police Station Kohima lungjemer COTPA 2003 Section 6(b) kübok enforcement drive ka March 23, 2021 nü ayongzüka

liasü.

Iba mapang aibelener nisung 50 dang senchi achi aser parnok ket nungi ngutetba moko agi yangluba osettem ya Officer in-charge matsüngdang South Police Station nung raksaa indokja liasü.



Manipur Congress lennirtemi Bodbarnü Rashtrapati Bhavan nung India Tir Ram Nath Kovind den ajurutepdang agiba noksa angur. Manipur nung parliamentary secretary inyakba atema MLA 12 disqualify asütsüba onük atema Governor-i teinyaktsü meinyakba atema parnoki India Tir den ajurutep. All India Congress Committee (AICC) Manipur in-charge Bhakta Charan Das-i anir Manipur Pradesh Congress Committee (MPCC) president Govindas Konthoujam aser AICC CWC regular member Gaikhangam nungtertemi anir Congress teshimtet teloki Ram Nath Kovind den ajurutep.

Assam election: Phase 1 nüboyimba tanü tembangtsü

Guwahati, March 24 (Agencies): Assam Assembly mezüngbuba election shilem atema nüboyimba March 25 nikongdang 6:00 ako nung tembangtsü. "Phase I kübok Assam Assembly constituency 47 nung election nüboyimba maparen March 25 nikongdang 6:00 tembangtsü. March 27 nü polling mapang jakdang ghonda 48 lia nüboyimba anentsü" ta ECI-i metetdaksü.

Iba ya Election Commission-i Representation of Peoples' Act, 1951 nung Arrla

126 nung lateta aliba ama inyaker ta parnokisa ashi. Iba mapang nisung shingaia senden ayonga mamentsü, lokti sentong nung o mejembitsü, procession magitsü aser television mesüra iba mesükba ajanga election dak sendakba kecha mesangdongtsü, ta ECI-i ashi.

Iba tetuyuba alema inyaktertem küm ana tashi tepuokdak ayutsü mesüra senchi achitsü mesüra temerenshi anaprong angutsü. Election Commission of India (ECI)-isa Assam Assembly

election shilem ajak nung polling anogo nung mesüra anogo ka jakdang political party mesüra candidate mesüra telok kechaia print media nung advertisement masütsü tenokdangba agütsüogo. Party kari dang advertisement asütsü lira, State/District level nung Media Certification and Monitoring Committee (MCMC) ajanga kuli asütsüla, ta ECI-i metetdaksü.

Iba tetuyuba ya political party ajak, candidate tem aser osangkaket ajak atema lir ta ECI-isa metetdaksüogo.

Conrad-i Garo Hills nung NPP candidate atema nüboyimtsür



Meghalaya CM-i Garo Hills nung NPP candidate atema nüboyimtsür

Shillong, March 24 (Agencies): April 8 nü Garo Hills Autonomous District Council (GHADC) election agitsü aliba jakdang National People's Party (NPP) National President aser Meghalaya Chief Minister Conrad K Sangma-i kanga dang mazüangi Garo Hills tesem nung nüboyima senzür.

Bodbarnü Darugre GHADC constituency kübokk Mangsang nung sentong ka nung Conrad-i nübortem tashi angaba party nem vote enoktsütsü ayongzüik.

"India ajungalen Congress-i yimten tamendakdak

samaogo aser parnok dak yimten temolungtetba kasha mali" ta paisa ashi.

Centre-i Meghalaya nung district council ajak asoshi Rs 700 crore lemzüksüogo. Iba nungi Garo Hills renloktsü atema GHADC-i Rs 250 crore shi angutsü, ta Conrad-isa shisem.

Meghalaya Legislative Assembly Deputy Speaker aser NPP lennir Timothy D Shiria ashiba agi Congress aija jembi.

"Parnok State mesüra Centre nung tashi mali, süra parnoki kodaser GHADC melenshitettsü?" ta Shiria-i

asüngdang.

NPP lennir Marcuise Marak-ia Rongjeng nung sentong ka nung jembidang "Council nung NPP marudang Congress party-i tamakok ngua inyakogo. Parnoki GHADC nung senotsü tim mesüi amshi" ta ashi.

"NPP-i council nung tashishitsü melii aser tiptema ketdangtsütsü meranger. Onoki GHADC tashi itdaksütsü atema inyaker" ta paisa ashi.

NPP lennirtemi Williamnagar candidate Denang T. Sangma aser Darugre candidate Henen R Sangma na atema nüboyimtsü.

ECI-i BJP candidate anema FIR benok; Nashishi olen jembi

Guwahati, March 24 (Agencies): Assam kübok Gauripur BJP candidate Banendra Kumar Mushahary-i yashi sentong ka nung nashishi indang jembiba atema Election Commission (EC)-i FIR benokogo.

Election Commission indang FIR ji Gauripur police station nung benok.

Mushahary-i Gauripur constituency nungi tokteper aser pai nashishiji "national dish of India" ta ashi.

Iba district kübok nübo agi tangar memenepba nisungtem aliba tesem ka nung pai iba olen jembi.

"Asenoki achiba nashishi kodaser noktangtettsü? Iba ya national food lir" ta BJP lennir Mushahary-i jembiba video nung tangoka lir. Ajisüaka paibo opposition party-i tiyazü jembi ta meyiper tai tongloktsüogo.

Hindutva pusemba telok Purvanchal Hindu Aikya Mancha-ia Dispur Police station nung iba olen jembiba atema FIR ka benokogo aser Mushahary merenshitsü takhangba agütsüogo.

Assam election jakdang AASU-i CAA anema lungkak aiter

Guwahati, March 24 (Agencies): Assam nung assembly election mezüngbuba shilem agitsü anogo ana dang lia Bodbarnü All Assam Students' Union (AASU)-i state ajungalen CAA anema lungkak aittsü tenzüko.

Lungkak aitba tenzüka AASU-i tanü Dighalipukhuri indang ayongküim nung ghonda 11 lumio.

"Election nung Assam nungeri Bharatiya Janata Party (BJP) nem telangzüba tajung agütsütsü. Parnoki Citizenship (Amendment) Act, 2019 atema tekong merangba atema langzütsü" ta AASU lennir Tutumoni Kalita-i ashi.

BJP national president JP Nadda-i tawa CAA indang olen ka jembiba aitsür. Iba Act tangsa magienra onoki lungkak

"Election mapang aser ano MCC benoka alidang kodaser candidate kati yamai jembi? PHAM-i iba inyakyim khukhua aitsür aser IPC kübok Banendra Kumar Mushahary anema ken o benoktsü akhanger. MCC alema inyakba aser tamangba yimsü ana tsünga tesempatep aser tsükchitep adokdaksüba atema pa merenshitsüla" ta parnoki FIR nung shia lir.

Iba olen ajanga Gouripur nung alirtem jashidaksüogo aser local Hindu nungeri election candidate dang tatok meshiang ta takhangba agütsüogo.

Osang angazükba agi Mushahary-i iba Constituency nung nübo agi tangar memenepertem mesüzüktsü atema iba olen jembi, kechiyong iba constituency nung nübo agi tangar memenepertem indang vote angu nung dang takok angutsü. 2016 Assembly election nung AIUDF candidate Nijanur Rehman-i vote 73,412 ngua taoba BPF candidate Mushahary (vote 53,512) madak takok angu.

aitba ulushitsü, ta Kalita-isa ashi.

Külen, Assam Jatiyatabadi Yuva Chatra Parishad (AJYCP)-ia March 25 aser April 1 anogotem CAA anema lungkak aittsü.

Deobarnü Union home minister Amit Shah-i West Bengal assembly election atema BJP manifesto sayatsüdang "West Bengal nung CAA mapa küma inyaktsü aser BJP sorkar kümra state nung küm 70 tashi lia arur nem senso agütsütsü" ta metetdaksüogo. Assam chief minister Sarbananda Sonowalia CAA ya temzüangi melaba Act ka lir anungji tarentak melii mapa küma inyaktsü ta jangjajangja shiogo.

Assam Assembly election indang mezüngbuba shilemji March 27, 2021 nü agitsü.

Tripura nung tetsür mozü shibelener ka apu

Agartala, March 24 (Agencies): Tripura Police-i Mongulbar aonung Agartala nung tetsür mozü shibelener ka puogo.

"West Champamura nung Uma Malakarand apu. La ket nung Brown Sugar gram 120, Brown Sugar enokba vial 200 aser vial tazüing 1,000 ngutetogo" ta Sadar Police Station Sub-divisional Police office (SDPO), Ramesh Yadav-i ashi.

Anogo ka tejakdang, Tripura police-isa Nahid Miah ta ser mozü shibelener tongti ka apu. Pa ya Bangladesh

nunger lir aser pa ket nung mozü aser sen aika puogo.

"Agartala yimti nung mozü shibelener tongtitem rongnung Miah ya ka liasü aser pa ya drug business nung tongtipang nisung ka liasü" ta Yadav-i ashi.

"Bangladesh, Shillong aser Manipur ajanga Tripura-i drugs bener arur" ta paisa shisem.

"Onoki state nung mozü shibelenba inyakyim samatsütsü meranger. Onoki temolung melemi bilemertem senzusenbongba mita repranger" ta SDPO Yadav-isa metetdaksü.



TIR YIMYIM YIMOBILEM (EDITORIAL)

DIMAPUR YANGTEPNÜ, METSÜREMI (MARCH) 25, 2021

Asenoki ola adoktsüla

Akhi tsürabur mapangbo lepteptsüngtepa yim kümteper aser yim kümer külena lepteptsüngteper mapang talangka manenteti yim kati yim ka makli ta tsükchitepa aruba nungjiang, konang tetushi aser tenüngsang angu. Ajisüaka, asenok tia ajung, Tsüngremi asenok kanga meimba agi British aser America nung yoka asenok rongnung lepteptsüngteper anendaktsü aser yim o yim na aser kin o kin na tsüngda tsükchiteper anener yimjung yangluba agi, joko, kecha tetsübu aser tarendak melii pei pei yim akümdang mekazükba lushi nung aluyima yimji yimjung nung tanü tashi lia arudagi. Atangji, nisungtem asoshi alushi tasen bushia oa yim tasen küma mesemteta alitsübaji alima mesama tashi maneni aotsü. Ajisüaka, alima nung ya, joko, kibur maliba libo maka nungji, tesem ka nungi nisung kari alima tasen ka yapoka mesemtetnyonga, akhi tsürabur mapang ama, yangji lia aliba purtem makdokerbo mekümtettsü aser makümtsüla, kechiyong tanü asenoki amangba Yisu temeim yimsü agi aji memelar aser kong südirsüaka alima yimten lir, anungji yimtenia nokdangtsüla. Aji oda, tangbo kari yim tasen kümnüra ali kiburtem dang parnoki mekazüka aliba alushi aser arem alia akümer. Iba amaji, tanü putu nung akümba yimtem aika Dimapur district nung angutsü. Atangji, karibo government-i wazüka ayuba ali aser arem tashiyim agi atsüngtetter aser tesüngmangtsü kaji government-ia kecha meshitetter, iba jagi government li aser arem tuluba tuluba samaa odagi. Item ajakji government nung alir aser malirtem ajaki pei lima kümzüka ayutsü asoshi bilema inyaker masü, saka pei kara ojang ta bilema inyakba agi Nagaland topur kanga mejungi raksaa odagi. Iba ama mapang ka nung, tan hombar nü Peren district nung Lamhainandi ta ajaba tesem ka nung mejangjatetba nisung kari yangji arem nung mapa inyaka lia nisung asem khasetba mapaji taoksatsüka aser tanü putu nung Naga Khristantemi inyak memesük inyakogo. Atangji, nisung khasetertemji mejangja aser mejangja yur kar dak tongloksütsübaji tim masü. Ajisüaka, government-i tang aser teti atema Naga nungertem rongnung ali atema metsükchiteptsüsa nisung khasetertemjia aputsü aser ali tsütsü mangatetteper alibajia tangatetteper kati arua jembitsütsü imlar. Iba ama Naga nungertem rongnung timtem lendong atalokdang, Naga nung dak tajung kaji, par kin mesüra ozü kin ta mali özüng raksaba mapa tamajung anemabo ajaki yimjak nung ola adoka aitsür. Aji oda, kodang asenoki asen kin daksa mesüaka asen lima nung, tang Peren district nung atalokba amaji, kodangsa özüng raksaba mapa tamajung atalokdir, ibaji aitsütsübaji asenok tama asütsüla. Tai liang, teli saka alu nung mapa inyaka lia nisung khaseta yutsür gari rongdoktsüba mapajibo kangasa tai tulu, anungji asenoki aitsütsüla. Aji oda, asenoki meteta yamaji ataloker asenoki ola madokra, asen dak ataloker masüba agi shishia mebilemer mesüra asenoki tatalokbaji tim dang atalokogo ta bilemer südi ta tangari bilemtsü. Aiben asenoki asen nisung aser asen züngsem dak timtem lendong atalokdang dang, shishia bilema ola adoker aser tang ama tangar dak atalokdangbo ola madoker. Ajisüaka, asenoki metettsüba kaji, kodangsa asenoki tamajung anema ola madoker, tetezüji asenok tamajung tsütsüji lir ta sayur. Joko, tangari asen dak yamaji mebilemtsüsa aser asenoka samanir kin aser nisung ama, ajak asoshi tebu aser lenir küma asen, pi ta mali, asenok asoshiho Naga nung ajak ya pei adianu aser kinunger kümer, tai dang tai aser shitak dang shitak ta shia len anitsübaji asenok khuret aser teinyaktsü asütsüla. Iba jagi Ao lima, Ao kin, Ao oshi aser Aotsür Aor tali temeraba aser tejangjaba akümtsü aser Naga lima tesünep nung alitsü.

OLEMSABANG

TENSA DEN PETA CHUBATEM KAKET AZÜNGBA

~ Dr. Temsüyanger, CTC, Aolijen

(Yashi adok nungi...)

Meyokteba tsüngremtem külemba

Solomoni pa kiba-lemmba aser yimsüsüba tesendakteper ajanga tangar tsüngrem aika nüburtemi külemtsü mela (I Chubatem 11:1-3; 2 Sam. 15:30-32; II Chuba. 23:13). Israel Tsüngrem item tsüngremtem madak temaba ta tangatetba liasü, saka meyoktepa külemtsü asoshi nüburtemi kecha tai mali ama mebilem.

Kibongtem raksaba

Chuba yimli nung kechi südir süaka kibongji tongtibangtiba liasü. Talisa kodang chubai temeranger sepai tashi ayu, yimtsüng nung kibongtemi kanga sashia timtem ajuru. Chuba yimli yangertetba nungi tenzüka, temeranger sepai asoshi temulunger tang masü, saka özüng agi teburtem shia, mesüra kibong nungi sepai shima liasü. Solomon mapang rara kecha maliasü, saka sepai tashi tulu yutetba agi linük wazüka yuteta liasü. Sepai tashi ita ayubaji Solomon asoshi liasü aser sepai asoshi ki yangluba, nok-nü yangluba, kor metsüba, talongtsü yangluba, item ajunga mapa inyaktsü asoshi yimtsüng nung alir kibongtem dak metaloka liasü. Ali melen saru aser tashiyim agi nübu akhangba ajanga parnoki züsentetbatem, inyaktetbatem, par nübutem, item ajunga chubai bener oadok. Talisa, Solomoni kodang Lebanon nung inyaktsü nüburtem nübu akhang, külen parnok tanishir kübok timatem, ano külen pei yimtsüng nung alu meinyaktet liasü, kechiaser aiben alu inyaktsü mapang madok, aji saka parnoki züsentetbatembo ajunga amai ali melen sarua chuba aser pa medemsortemi bener oadok.

Solomon Yimli nung lendong aser Ainkar ola (1 Chubatem 11:27-34)

Laishir mongintemi ashir, kechiba Northern kintem Yeroboam-i anir Rehoboam chuba anema noktak ta süra, ali melen saruba aser tashiyim agi pei nüburtem dang nübu akhangba anema liasü. Yeroboam ya Solomon mapang Yosep kin madak tongti lenir shimba liasü. Laishir kari ashir, Solomon sür Northern kintemi parnok nübu taah chubai magütsüba atema chuba anema noktak. Yeroboami Ephraim linük nung kor talongtsü noklang asem tashi aser temeranger sepaitem aika ngutet aser yimti jaratem tashi ita yanglutet. Maneni Dawid aser Solomon yimli anema noktakba nung kin-kidong lenirtemi (tribal leaders) kanga nungeta liasü, kechiaser item lenirtem ano kanga nüburtem madak tongtibang liasü. Northern kintem nungi Rehoboam dangi alua ajuruteper. Parnok lenirtemi nüburtem ola bener, nüburtem tebilemba Rehoboam den lemsateper, saka chubai magizük. Kodang chubai magizük, Northern kintem Yeroboam-i anir pakzüka ao, Yeroboam chuba aküm.

Tekong 30 nung ashir, Ahijah-i sü ka koba pai abena liasü aji agizüker ter ana küma shisar, Yeroboam nem ter agütsü, tetezü Israel kin ter Dawid yimli nungi pakzüka oadokba tamaittsü liasü. Kari ashir, Ahijah ya Dawid aser Solomon chuba yimli aser sentong anema noktaker tongtibang lenir ka liasü. Talisa Eli nungi jakzüka putir kin-i kangasa pa nem teyari agüja nokdak. Laishirtem aikati ashir, Ahijah-i chubar sentong aser yimli anema apusobaji nüburtemi mulungba aser parnok tena liasü. Ahijah ainkar ama tejen putu nung ainkartemi loktiliba nung, rongsen ketdangtsüba nung, tamangba nung chuba aser pa sentongtem anema apusoba asenoki ainkar kaketter nung angur (Am. 8:4; Is. 5:8; Micah 2:9ff). Chuba aser yimsüsürtemi (upper class) loktiliba ajunga nung tashiyim inyak aser ochimashi inyak nung, parnok kija aser kibong asoshi rongsen bendentsü leman lapoktsü. Anungji ainkartemi nüchi (justice) aser temeshiba (righteousness) asoshi ayimten aser noktak. Süra, nüchi aser temeshiba ya kechi? Tsüngremi meimchir shia nem nüchi (basic rights) agüja lir. Ibai ajanga Tsüngremi asen lokti nung telongjem adokdaktsüner. Iba nüchi yabo özüng ajanga bendangba nüchi masü, saka temeim (kindness) aser yimlibilem (mercy) agi lokti taküm nung nüchi aliba ta ainkartemi angatetta liasü. Anungji, nüchi süra tilar dang meimba aser kangshia/reshikangshia alirtem alangzüka, iba tangatetba angutsü.

Solomon sentongtem ajanga pa yimli nung telok asem dang tajangzü angu. Parnokji, yimsüsürtem, tongti temeranger sepai lenirtem, aser tamangba nung lenirtem. Parnoki yimden-yimli aser sobaliba tasen ka yangerteta liasü. Saka aji par chichiba sobaliba aser tamangba tesayuba den kenyongi balaka liasü. Anungji parnoki aiben par tejen tamang tangatetba aser sobaliba tesayuba nokdangtsü merang. Külen ano telok ka liasü, sepai telok balala nung lenirtem, yimsüsüba nung lenirtem, shishilembar telok; Ano telok asemmba ka liasü, yimtsüng nung nüburtem/aluyimertem shirnoki linük asoshi ali melen khuret aben, tashiyim agi nübu akhangba khuret aben, shirnok ajak rongnung takoksaba tia telok liasü. Kodang Solomon chuba asü, item teküboktiba tia nung alirtem telok nungi, linük nungi temelenshi asoshi nüburtemi chuba anema apusoba asenoki angur. Solomon mapang nüburtemi nüchi aser yimjung mangu. Anungji Israel nübur teimla, Tsüngremer loktiliba tasen, Solomon mapang samadok.

Chubatem kaket zülur jagi ashir, Solomon mapang nüburtem ajunga pela liasü (1 Chubatem 4:20, 10:8), saka ibaji linük azükaruba nung pelaba; aji shidakba nüchi aser temeshiba nung nüburtem pelaba masü. Anungji, nüchi aser temeshiba Solomoni kenyongi tezülen nung ayu. Solomon-i saku/kasa jenjang rongsensüba (economy of equal) melena lalushipong rongsensüba (lavish economy) bena aru, nüchi aser ochi yimten yimli den pai tetokteper aser ochimashi aser taküm raksatsüba yimden yimli bena aru. Solomon-i tamangba yimsü kenyongi amadok, anungji ainkartemi ayimtenba temelenshi loktiliba taküm asoshi teimla kecha maliasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogotemi Rohingya camp nung takoksa angurtem yarir



March 22, 2021 nü Bangladesh kübok Cox's Bazar nung aliba Balukhali Rohingya refugee camp nung ki aika rongdoker aliba noksa nung angur.

March 24, 2021: March 22, 2021 nü Bangladesh kübok Cox's Bazar nung aliba Balukhali Rohingya refugee camp nung ki aika rongdokba sülen Arogotem densema charity telok balalai tsüngdong oa teyari balala agütsüdar. Balukhali refugee camp nung atalokba mi lendong nung nisung 15 asü, nisung 400 samaogo aser nisung 27,000 talidak makai kümogo.

Mi lendong nung khen atema yangluba ki 6,000 dak tema rongdokogo, ta refugee officials aser development workers-i metetdaksü. Nisung aika samaogo, anungji iba lendong nung asürtemji iba dang nungjagi (15) timba asütsüa akok, ta ketdangsertemi metetdaksü.

Cox's Bazar nung Caritas Rohingya project nung tongti, Immanuel Chayan Biswas-i, "Refugee tem nem teyari agütsütsü atema parnok nüngdak asandangdar," ta metetdaksü.

Caritas Rohingya project-i Myanmar nungi aruba Muslim refugees nem teyari agütsütsü atema inyaker; Caritas Rohingya Project ya Bangladesh nung Arogo kongsang lir.

March 23, 2021 nü

osangbener den jembidang Biswas-i, "Mi lendong atalokba tesem nung mitsü aser tongshi kar dang anüing, shiruru aser ozü-sangnu aika rongseter angu. Tang tashi nungbo onoki nisung tenet dang asüba jangjaogo, ajisüaka nisung aika kanga mejungi yirur hospital nung mongdar," ta metetdaksü.

"Onoki talisa chiyungtsü masüba tanga nüngdak osettem nung rangloker inyaker. Ajisüaka nüngdak apir onoki chiyungtsü-a agütsüdar. Tang parnoki chiyungtsü aser tejenokdak nüngdaker. Aonung parnok mejangtsü atema Caritas-i Rohingya camp nung centres aika lapokogo," ta paisa metetdaksü.

Mi lendong atalokba mapang nung refugees 50,000 dak temai ki toktsür jena liasü; tanü tashi nung refugee camp nung tang mi lendong atalokba ya lendong tulutiba lir.

Taküm January ita nunga Nayapara refugee camp nung mi lendong ataloka ki 500 shi rongdok aser nisung 3,500 talidak makai aküm, ajisüaka nisungbo masü.

March 22 nikongdang 4:00 ako meta Balukhali camp nung mi lendong tenzükbä sülen ghonda ti tashi nung ang miji

ensepteta liasü. "Ki 2,000 shi rongdok aser ki 6,000 dak tema raksa. Melungtet telok balalai ketdangsüba hospital ana rongdok. Onoki takoksa angurtem nem chiyungtsü agütsüdar," ta ketdangser kati metetdaksü. Mi lendongji komaser tenzükar memetet, aser iba tatalokba bushisüngdang tenzükogo, ta paisa metetdaksü.

Ukhiya Fire Service Station nungi ketdangser, Mohammad Emdadul Haque-i, mi lendong ajanga takoksa tulu bener arutsüogo, aser takoksa asadangtsü atema anogo aika agütsü, kechiyong kilometer asem telongtet nung aliba ki ajak rongdok, ta metetdaksü.

Myanmar nung Rohingya nunger küm aika lia aruaka Buddhist yimsü amanger nütsüing timba aliba linük nung Rohingya nunger ya ozüing alema arua alirtem, ta züingshir.

Parnok nem senso temeden magütsüba dang masü saka parnok kanga reshikangshir.

Myanmar nungi Rohingya nunger aika jenshia tang parnok million ka shi Bangladesh kübok Cox's Bazar district nung makeshift camp 30 shi nung jenoka lidar.

Kwara State nung Khristan school ka den Tenla kitem amak

March 24, 2021: Nigeria kübok Kwara State nung aliba Khristan mission school tem nung tetsürtem nem 'hijab' agidaktsüba onük nung mangatettep tulu adokba sülen Khristan school ka den Tenla ki aika amak, ta osang ka ajanga metetdaksü.

Hijab ya Muslim tsürtemi tekolak/tejak nembangba sü lir.

Khristan school nung security liaka mejangjaba nisungtemi kangshia school süngkümji lapoktsü merangba nungi tenzüka lendong tulu adok.

State Teaching Service Commission, TESCOM nung chairman, Malam Tauheed Bello-i lokti denji jembitsü

merang saka lokti jagi mangai school amak.

Pai o jembizükli mapang tatsüka tsüngda C&S College Sabo Oke anasa aliba Emmanuel Baptist Arogo telung nungi injang khaloktsü aser long den tanga oset amshia Tenla kiji raksatsü.

Iba sülen lokti jagi St. Barnabas LGEA primary school den Tenla ki kar raksatsü.

Khristantemia longjemer Khristantem kümzüksü aser Arogo meyong kiojentem kümzüksü meranga liasü.

Osang angazükba agi, hijab agidaktsüba mangatettep ajanga Kwara state sorkari February 19 nü school tem

shibangdakja liasü, iba sülen tawa school ter lapoktsü mela.

Khristan missionary temi lapokba Mission school tem nung hijab agütsü Arogotemi memelar, ajisüaka state nung aliba sorkar school tem nungbo tetsür ajak nem hijab agidaktsütsü atema Kwara State sorkari temelaba agüja liasü.

Sorkari sangdong agütsüba sülen longkak ait tenzüka liasü.

Khristan lenirtemi ashiba agi, Khristan mission school tem nung hijab agütsü melaba ajanga kiralongrartemi school nung Muslim tsürtem aser tanga yimsü amangertem bendangtetsü aser ibaji ajanga onok chirnurtemi timtem ajurutsü, ta metetdaksüogo.

ANOGO ABEN TSÜNGREM DEN

Toma-i dang Yisu zübu angatet

"Idangji pai Toma dang ashi, yangi ne temeyong asenokang aser kü tekabu ajiang, aser ne teka songtoka kü tesa nung amuokang; aser mamangi teli, saka amangang." (Yohan 20:27)

Laishiba nung Yisu nütsüing rongnung Toma shibai dang "Terata Toma" (Doubting Thomas) ta laishiri tenüing jaloktsür, pai Yisu shia aruba nung rata-a alibaji tamang makatetba tanela ka ama züingshir. Saka Laishiba nung jungjunga reprangdangra Toma-i dang masü, saka nütsüingtemia Yisu shia aruba meprangteti liasü. Mary Magdala-ia Yisu-ji atsüki anüker ka ama bilem, kari tasüba nungi shia arutsüla ta laishiba nung ashiba mangatet, Emmaus lenmang nunga nütsüingtem kari Yisu mereprangtet. Anungji kari mangatet, kari meprangtet, aser kar rata-a liasü. Saka Toma-ji dang aija bilemer. Toma-i rata bilembaji ranglok balaka nungi bushidangra ochiba nung tamang makatetba masü, saka ochibaji tajangja nung angatetnüa aliba angateter. Pa emotional tamanger ka masü, saka amangli amangerbo tangatetba aser kuli lia tamanger ka sünü. Tangar nütsüing shingaia Yisu zübu indang shishia maliasü, saka Tomai dang Yisu kangki nung timtemba aser temang nung zübu nungji kongshidangnüa liasü. Toma-i dang asen menen tarakji angatet. Yisu zübu indang naia shishia bilemdangang.

Sarasadem

Kibuba Yisu, na onok menen yong ne temang nung zübu aket. Onoki shishia mebilemer, saka Toma-i ne zübu nung kongshidang pai iba zübu nükjidong angatet. Iba zübu ajanga onok aneptsü. Amen.

Syria nungeri Pope nem linük semdangdaksüner

March 24, 2021: Tawa Pope Francis-i Iraq linük semdangba agi temelung kanga süa Syria nungeria Pope nem linük semdangdaksüner, ta Cardinal Mario Zenari-i metetdaksü.

March 23 nü video conferencing ajanga agiba osangbenertem senden ka nung jembidang Cardinal Zenari-i, Syria nung Khristantemi dang masü saka tanga yimsü amangertemia Pope-i Iraq semdangba indang televison nung kanga jangraa reprangtepogo, ibaji dang masü saka Syria nunger karibo arrtsü adena Iraq-i oa Pope-i jembiba sentongtem nung aden; parnok rongnung Syria nunger bishops ana, putir kar aser lanur kar densema lir, ta metetdaksü.

Zenari-i, "Alima tesem balala nungi ketdangser kar aser Khristan masüba ketdangsertem aikati Pope-i Iraq semdangba atema tenüingsang agütsüogo," ta ashi.

"Parnok karibo, Pope-i kodang Syria linük semdangtsü ta asüngdangogo. Ni parnok dang, Pope Francis-i Syria mamadok, aser pa melungjang nung Syria teti lir, ta ni shiogo," ta Zenari-i metetdaksü.

Italy nunger tongti putirisa, "Tensa tapet nung Pope-i Syria semdangtsü," ta ashi.

Osangbenertem senden ya


Caritas International-i ayongzükbä liasü; tesüiba küm ter tashi Syria nung rara ajanga Syria nunger takoksa asadanga Arogotemi rangloker inyaktsü nükjidong nung osangbenertem senden ya ayongzüka agi.

Iba sentong nung Melkite Archbishop aser Caritas Syria Tir, Jean-Abdo Arbach, Caritas Syria Director, Ryad Sargi aser Caritas Internationalis secretary-general, Aloysius John nungera densema liasü.

Zenari-i, küm ter tashi rara ajanga Syria nunger aikati tarutsü atema teimla makai kümogo, kechiyong Syria nung yimjung ken o, linük rongsenkettsüing asentenshitsü aser terenlok mapatem asentenshitsü atema inyakba anenadokogo, ta metetdaksü.

"Joko ita ishika Syria tesem balala nung bomb aser rocket mamshir, saka sensak tia ajangshiogo aser nütsüing shilem 90 bo below poverty line (BPL) jenjang nung lir ta UN-i asadangtetogo," ta paisa metetdaksü.



"Syria tanaben yangershitsüla aser r o n g s e n k e t t s ü n g asentenshitsüla, mesüra linük nung yimjung malitsü. Nisung aika teimla samaogo, anungji rongdak süa mera agia inyaktsü nüngdaka kümogo," ta paisa ayongzük.

OLONG PAITEP # 5763

TIPIEN		LANGTSÜNGLEN	
2. Külen dang masü	- (6)	1. Amang ozü ka	- (5)
6. Suwar masü	- (4)	2. T _ _ _ aiter	- (4)
7. Süng mesüra sü konga ayudak	- (6)	3. Sü yanglu	- (4)
9. Tashi mali aküm	- (4)	4. Kimen	- (6)
10. Tanishir	- (5)	5. Ain tamajung	- (3)
11. Sü temang nung enok	- (4)	8. Saklok	- (4)
14. Asüngdangba ashi	- (6)	9. Chiyongtsü tamajung aküm	- (4)
16. Saklok	- (4)	10. Kioktsü yangluba tou	- (6)
17. Arem shiruru ka	- (6)	12. Melenshitaksü / Alenbanga ayu-	- (5)
		13. Tzüma nung senzüba	- (3)
		14. Tanemi	- (4)
		15. Ta _ _ _ talu	- (4)

OLONG PAITEP # 5762 TELANGZÜBA

TIPIEN :	LANGTSÜNGLEN :
1. Lema , 3. Osang, 5. Mezüng,	1. Lamen, 2. Sangken, 3. Omen,
6. Agi, 7. Süra, 8. Tebutem,	4. Asüküm, 7. Sendong, 8. Tejang,
9. Amen, 12. Odi, 13. Asayar,	10. Tanga, 11. Tazü.
14. Angsü. 15. Agima.	

Noksa nung meputepi aliba 10 bushiang**TANÜBO NAI LANGZÜANG**

- Q. FFC ya kechi dang ajar ?
 A. Foreign Finance Corporation B. Film Finance Corporation
 C. Federation of Football Council

===== (Taruba adok nung onoki langzütsü)

YASHI ADOK TELANGZÜBA : Linük 121

AO OSHI ANGAZÜKDAK:

TANÜ ANGAZÜKTSÜBA OJANG

Api

(n) Sü atakdang teberem nung zülökba shiküp (weaving belt)

* Sü atakdang amshitsü atema nashi küp agi api yanglur.

Api

(v) Lenmang yangluba mesüra merükba (Road construction or cleaning)

* Benjongmong anasa yimkong nübodoka lenmang api.



Tir Yimyim

Happy Birthday

Tenüng : WAPANGNOK
 KÜM : 10
 Anogo : 25 March
 Talidak : Old Showuba

Happy birthday ANOKER
 Tsüngremi ANOKER arishi talang den taküm
 temoatsü aser takok nung len aniangma.

~ Tenu Tutu, Benben & Oja, Oba

**NAI-A YA METETTER MA?****Alima nung nisung timtibai jembiba oshi ter**

- | | |
|---------------------|-----------------------------|
| 1. English | - Oshi jembir billion 1.132 |
| 2. Mandarin Chinese | - Oshi jembir billion 1.117 |
| 3. Hindi | - Oshi jembir million 615 |
| 4. Spanish | - Oshi jembir million 534 |
| 5. French | - Oshi jembir million 280 |
| 6. Standard Arabic | - Oshi jembir million 274 |
| 7. Bengali | - Oshi jembir million 265 |
| 8. Russian | - Oshi jembir million 258 |
| 9. Portuguese | - Oshi jembir million 234 |
| 10. Indonesian | - Oshi jembir million 199. |

SUDOKU # 5805

		8				9		2	3	8	1	4	6	2	9	5	7
		9	1	3			4	6	4	9	7	5	8	1	2	6	3
2	4		6	8		1			2	5	6	7	9	3	1	8	4
5	3		8					9	9	7	5	6	2	8	3	4	1
9		2	5		3	6	1		6	4	3	1	7	9	8	2	5
	1	4	2			3	5	7	8	1	2	3	4	5	7	9	6
		5	9	2			6		7	2	4	8	3	6	5	1	9
							9	4	1	6	9	2	5	7	4	3	8
4		1	7				8	3	5	3	8	9	1	4	6	7	2

TELANGZÜBA # 5804**OJANG LUTEP # 5349**

- | | | | | | | | | | |
|---------------|---|--------------------------|--------------------------|--------------------------|--------------------------|--------------------------|--------------------------|--------------------------|--------------------------|
| 1.SNOAKEI | : | ☐ | ☐ | ☐ | ☐ | ☐ | ☐ | ☐ | ☐ |
| 2.NATEMAGTER | : | ☐ | ☐ | ☐ | ☐ | ☐ | ☐ | ☐ | ☐ |
| 3.DNGA | : | ☐ | ☐ | ☐ | ☐ | ☐ | ☐ | ☐ | ☐ |
| 4.AHIS | : | ☐ | ☐ | ☐ | ☐ | ☐ | ☐ | ☐ | ☐ |
| 5.SGRÜNTEBMIO | : | ☐ | ☐ | ☐ | ☐ | ☐ | ☐ | ☐ | ☐ |
| 6.ANOSEK | : | ☐ | ☐ | ☐ | ☐ | ☐ | ☐ | ☐ | ☐ |
| 7.MMCHEIIR | : | ☐ | ☐ | ☐ | ☐ | ☐ | ☐ | ☐ | ☐ |
| 8.AAKJ | : | ☐ | ☐ | ☐ | ☐ | ☐ | ☐ | ☐ | ☐ |
| 9.KANAG | : | ☐ | ☐ | ☐ | ☐ | ☐ | ☐ | ☐ | ☐ |
| 10. MEERIM | : | ☐ | ☐ | ☐ | ☐ | ☐ | ☐ | ☐ | ☐ |

OJANG LUTEP TELANGZÜBA # 5348

RONGSEN TULU PENZÜDANG NUNGIBO TEKA NUNG
 RONGSEN TERA ALIBAJI TAoba

TAN HOPTA ATEMA - KOMA SÜLA ?

- Q. JCPI teloki akangba ama tangsa tang 1963 küm 1st December nung ajemdaker, Nagaland Senso Register (Register of Indigenous Inhabitants of Nagaland) ka lapoka Nagaland sensosanger tenüng zülüok tenzük nunga koma süla ?

Olong 20 shi nung March 26, 2021 tashi nung iba telangzüba ya onok dangi (e-mail - tiryimyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.



March 24, 2021 nü Patna nung Bihar Rajya Kisan Sabha züngsemtemi aluyimba ozüing tasen anema Vidhan Sabha tashi longkak aita aoba noksa nung angur.

BJP nungi Chief Minister ji Bengal nunger asütsü: PM

New Delhi, Metsüremi/ March 24 (Agencies): Bodhbarnü Ato kilonser, Narendra Modi-i, West Bengal assembly election nung BJP-i takok ngura state nung BJP nungi chief minister ji tanga state nungi masü saka West Bengal nungi asütsü, ta metetdaksü.

BJP lenirtemji bendangertem, ta West Bengal Chief Minister Mamata Banerjee-i jembiba o aija Ato kilonser Modi-i, Bengal ya Bankim Chandra Chattopadhyay, Rabindranath Tagore aser Subhas Chandra Bose nunger ama nüngtugu nisungtem sotetba lima lir, aser iba ama tesem ka nung shinga

bendangertem masü, ta ashi.

"Vande Mataram ajanga Bengal-i India nunger longjemdaksü, ajisüaka iba ama lima ka nung Mamata-i bendangertem indang jembir. Yangi (Bengal) India nunger shinga bendangertem masü, saka ajak Bharat Mata chirtem lir," ta pai ashi.

Trinamool Congress tongti, Mamata aija Modi-i, "Onok dang 'raliwalirtem' ta ajar, onok asayatsür aser onok mezügmeshir. Didi (Mamata), Rabindranath'er Bengal nung shinga bendangertem ta mezügmeshir," ta ashi.

Purba Medinipur district kübok Kanthi nung election

nüboyim sentong nung jembidang Modi-i, state nung kodang BJP-i sorkar kümdir CM ji state nungisa asütsü, ta metetdaksü.

West Bengal elections atema nüboyimba mapang Mamata-i aiben la ya state jala lir, ta jembiba nungi lisopur-bendanger onük nung aitsütepa arudar.

Modi aser Home Minister, Amit Shah na aitsüba olen ka nung laisa, lai Delhi mesüra Gujarat nungi bendanger nem Bengal yimsü mesüdaksütsü, ta jembiba liasü. March 27 nungi tenzüka West Bengal elections shilem ti lemsar agitsü aser May 2 nü vote zünga election osang sangdongtsü.

TMC MP temi Rajya Sabha nung NCT Bill anema nokdaksü: Derek O'Brien

New Delhi, March 24 (Agencies): Bodhbarnü TMC MP, Derek O'Brien-i, par party nungi MP temi Delhi Lieutenant Governor nem tashi tulu agütsüba GNCT Bill anema nokdaksü atema Delhi-i ogo, ta metetdaksü.

Derek-i twitter ajanga, "State pongu nung election tenzüksü atema anogo ana dang lir. Ajisüaka nüburtemi shimetba Delhi sorkar nem tashi magütsütsü atema benokba GNCT Bill anema nokdaksü atema Trinamool nungi Rajya Sabha MP tem ilonga Delhi-i ogo. Democracy, linük temzüng aser Parliament anema ano kotari ka setoktsür. Tamajungtibaji Home Minister (Amit Shah) leniba nung iba Bill benoker masü saka election nüboyimba nung ang senzür. Mamangteter," ta metetdaksü.

Mongolbarnü O'Brien-i shidi ka ajanga Rajya Sabha Chairman, M Venkaiah Naidu dang, tang West Bengal assem-



bly election aliba ajanga TMC MP tem Delhi nung mali, anungji iba Bill ya magizüki lidaktsüner, ta mepishia liasü.

Government of National Capital Territory of Delhi (Amendment) Bill, 2021 ya Lok Sabha nungbo agizükogo; iba bill ya agizükra Delhi nung Lieutenant Governor (L-G) nem tashi tulu agütsütsü.

Iba bill kübok ozüing tasen benoktsü mesüra mapatong balala atema Delhi sorkari LG dang mezüng asüngdangtepa inyaktsüsa akümtsü.

Sri Lanka anema vote magütsüba agi Tamil nunger ashioktsüogo: Chidambaram

New Delhi, March 24 (Agencies): Bodhbarnü Congress lenir, P Chidambaram-i Tamil Nadu nunger dang, UNHRC nung India-i Sri Lanka anema vote magütsüba atema taruba assembly election nung AIADMK-BJP teloktep nem temerenshi agüjang ta ayongzü.

UNHRC nung Sri Lanka anema renemba bangzüng nung India-i vote magütsüba ji Tamil nunger ashioktsüba lir, ta taoba mapang Union Finance Minister, Chidambaram-i sa metetdaksü.

"UN Human Rights Council nung Sri Lanka atema renemba bangzüng nung India-i vote magütsü. Iba ya Tamil nunger aser parnok taginüba anema lir," ta Bodhbarnü Chidambaram-i twitter ajanga metetdaksü.

"Tamil nunger taginüba anema inyakba atema Tamil Nadu nungeri AIADMK-BJP teloktep nem temerenshi agütsütsüla, temerenshi agütsütsü," ta pai tanga tweet ka ajanga metetdaksü.

Sri Lanka nung meimchir temeden alema inyakba atema United Nations Human Rights Council (UNHRC)-i Sri Lanka anema bangzüngka renema liasü.

Sri Lanka nung civil war (2008-09) mapang Liberation Tigers of Tamil Eelam (LTTE) anema inyakba kulitem bendentsü atema UN tentet-UNHRC dak temeden lir.



India-ibo, Sri Lanka nung meimchir temedenji telatetba ana nung ajemdaker asadanger, ta shia Sri Lanka anema renemba bangzüng atema vote magütsüli liasü.

India-isa Colombo (Sri Lanka) dang yimtenren tashi lemsatepba atema inyaktsü aser linük nung Tamil nunger taginüba atema inyaktsü mepishia liasü.

Assembly menden 234 aliba state nung April 6, 2021 nü election agitsü.

Tamil Nadu nung minorities- Muslim aser Khristantem votes ya AIADMK aser DMK naprongla atema kanga tongtibang, saka taruba election nung Muslim aser Khristantemi DMK ang yaritsü amai asadangteter, kechiyong Mongolbarnü Tamil Nadu Jama'athul Ulama Sabai-i yimjak nung DMK-i aniba teloktep yaritsü, ta metetdaksüogo aser Bodhbarnü Tamil Nadu Bishop Council-ia 'secular front' dang yaritsü, ta sangdongogo.

Taruba küm 8 tashi GST kübok Petrol/Diesel mezüngoktettsü: Sushil

New Delhi, March 24 (Agencies): Bodhbarnü BJP lenir, Sushil Kumar Modi-i, taruba küm 8-10 tashi petrol aser diesel totzü GST küboki maittettsü, kechiyong GST kübok totzü züngsemra ibaji ajanga state ajak atema saru 2 lakh crore takoksa angutsü, ta metetdaksü.

Bodhbarnü Rajya Sabha nung Finance Bill 2021 atema o lemtepa mapang Sushil Modi-i, totzü products nung centre aser states senteper saru 5 lakh crore dak tema arur, ta metetdaksü.

Tesüiba küm ka tsüingda petrol aser diesel totzü jenang kanga atuba aser state kar nungbo petrol litre ka nung sen 100 dak tema ajungba sülen Congress densema opposition

party kari petrol aser diesel ya GST kübok aitdaksütsüla, ta akhangba mapang nung Parliament nung iba onük süoka jembir.

Mongolbarnü Lok Sabha nung Union Finance Minister, Nirmala Sitharaman-i, petrol aser diesel na Goods and Services Tax (GST) kübok aitdaksütsü atema taruba GST Council senden nung o lemteptsü, ta metetdakja liasü.

Sushil Modi-i, opposition lenirtemi tangalenbo melamela o balala jembir, ajisüaka GST Council nungbo shingaia iba onük mebenoker, ta ashi.

"Petrol aser diesel na GST inyakyim kübok aitdaksütsü atema mapang shia kakteta jembir. Ni mapang talangka nungi GST nung inyaksema

arur. Petrol aser diesel ji GST kübok aitdaksütsü saru takoksa sen 2 lakh crore ji shibai state tem nem agütsütsü?" ta pai asüngdang.

"Taruba küm 8-10 tashi petrol aser diesel ji GST kübok maittettsü, kechiyong saru 2 lakh crore takoksa angutsü atema state shingaia memelunger, Congress mesüra party balalai yimsüsüba state shingaia melunga mali," ta pai ashi.

"Opposition nungi kari GST atema asayatsür aser karibo GST ya 'Gabbar Singh Tax' ta jaloktsüogo. (Congress-i yimsüsüba) Chhattisgarh mesüra Rajasthan süoka chief minister mesüra finance minister shingaia GST anema menokdak," ta paisa shisem.



March 24, 2021 nü Mumbai nung aliba CSMT nung passenger temi COVID-19 Rapid Antigen test agitsü atema tarensena nokdaka aliba noksa nung angur.

Myanmar nung mitkartemi tetsürchanu ka khaset

Mandalay, Metsüremi/ March 24 (Agencies): Myanmar linük kübok yimti tulutiba jenjang tanabuba nung aliba Mandalay nung sepaitemi injang khaloktsüba mapang arishi küm tenet tetsür ka lar kidang khaseta taoba ita mitkari sorkar atsüngdokba anema nokdaker dak sepaitemi tashiyim amshiba nung asürtem rongnung tanutsütila kumogo.

Mongulbarnü Khin Myo Chit ya tebu indang tebi nung mena lia sepaitem lar ki telungi aita la tebu dak akhatsü merang, ta la teyi-i Myanmar Now news agency dang ashi. Iba jila nung tebur ana khaset, ta osang ajanga ashi.

Mandalay funeral service nung inyaker kati osangbener dang ashiba agi, arishi küm tenet tain tetsürla ya Chan Mya Thazi township nung Mongulbarnü injang agi asü.

Iba tatalokba indang mitkartem nungi osang kecha mali.

Democracy busema longkak aitertemi ki-o-jen raksatsür aser azüdokshir, ta mitkar lenirtemi ashir aser

anogoshi longkak aitba azüoktsü asoshi tashi tajemtiba amshir, ta ashir.

Mongulbarnü mitkar indang odongtar Zaw Min Tun-i nisung asüba indang jashia ashi aser tang tashinung longkak aiter nisung 164 tepsetogo, ta ashi.

"Parnok ya asen senso lir," ta pai ashi.

Myanmar nung mitkartemi sorkar atsüngdokba sülen nisung asüba aser apuba indang bushiba telok, Assistance Association for Political Prisoners (AAPP) ajanga March 23 nü Khin Myo Chit densema nisung tajemba agi 275 süogo, ta shia liasü.

La dak tepok nung akhaba sülen asü, ta AAPP ajanga ashi, saka iba osang ya tejangja monguteti lir.

"Yimjung nung longkak aiter dak azüdokshiba mapang tanurtem dak maneni tenük yokba asoshi aoksar. Tensa ajak nung tanurtem kumzüka ayutsüla aser onoki ano maneni sepaitem dang longkak aiter anema azüdokshiba tangsa anentsü ajungshir," ta Save the Children ajanga ashi. Iba

azüdokshi nung tanur 20 takum samaogo, ta parnoki ashir.

Hombarnü Mandalay nungsa teburchanu ka tepseta liasü.

Tun Tun Aung ya par ki telung nung liasü aser pa longkak aitdak dena meliaka tepset. Pa temang ya Mongulbarnü arem.

Myanmar nung meilongi democracy dangi meyipba maparen anendakja mitkartemi sorkar atsüngdokba aser tanen makai longkak aitba ajemreptsü asoshi tashiyim amshiba atema linük balalai aitsür.

Aung San Suu Kyi'er National League for Democracy (NLD) ajanga takok anguba November election nung ashikülak mapa inyakba ajanga sorkar atsüngdok, ta mitkartemi ashir, saka iba taitzüba electoral commission ajanga magizüker.

Mitkar lenirtemi küm ka atema state of emergency sangdonga lir aser election tasen agitsü nangzük, saka anogo lateta mali.

Dubai yimsüsür Sheikh Hamdan süogo

Dubai, Metsüremi/March 24 (Agencies): Emirate of Dubai indang deputy ruler, Sheikh Hamdan bin Rashid Al Maktoum arishi küm 75 nung süogo.

Sheikh Hamdan ya UAE indang finance minister liasü aser pa ya Dubai nung tang yimsüsür Sheikh Mohammed bin Rashid Al Maktoum indang adianu lir.

Sheikh Hamdan ya ita ishika shiranga liasü.

Bodhbarnü Sheikh Mohammed-i pa tenu indang noksa ka social media nung prokshi aser yangji, "Asenok Tsüngrem meyong aser asernok Pa dangi meyipa aotsü... Tsüngremi na aochiangma, kü adianu, ni yarir," ta zülutsü.

Sheikh Hamdan ya December 25, 1949 nung aso, shiba taoba yimsüsür, asür Sheikh Rashid Bin Saeed Al Maktoum'er jabaso tanabuba liasü.

Pa ya Trucial States ta jembiba tesem nung intet, koba Persian Gulf tzükumlen Arab sheikhdом ka lir, aser 1820 nungi British nung kübok lia aru.

Taoba yimsüsür, asür Sheikh Zayed Al Nahyan-i UAE tentetba sülen Sheikh Hamdan ya 1971 küm



mezüngbuba cabinet nung shimokdang nungi finance minister inyaka aru.

Pai Dubai ya alima nung shishilempaba tsütsü tiyongtsü ka kumdahtsü ta züngshir aser International Monetary Fund aser Organization of the Petroleum Exporting Countries Fund for international development nung Emirati delegations pai anir liasü.

Dubai rongsenketsü nung company balala, tatishitsü agi Dubai Ports Authority, Dubai World Trade Center aser Dubai Natural Gas Company Limited amala pa kübok liasü.

Teti ama, UAE nung kor asemtepba nung pa tenüng ya tongtipang ka akum aser 1981 küm Shadwell Racing tenteta asemtepba nung amshiba kor nüngtugu aika adokdakja liasü.

Southwest Pakistan nung nisung asem pokset

Islamabad, Metsüremi/ March 24 (Agencies): Pakistan southwestern tsütsü arrtsü anasa aliba Chaman jila nung improvised explosive device (IED) ka poka tajemba agi nisung asem asü aser 12 yiru, ta ketdangsürtemi ashi.

Iba lendong ya Mongulbar nikongdang atalok, koba police indang gari ka nung tenük yoker ppkloktsüba lir, shirnok provincial capital, Quetta nungi northwest tsütsü mile 62 shi pilar aliba jila kübok Levies Lines area nung teti ama patrolling senzüa liasü.

"Iba tesem nung shishilempadak motorcycle ka anena liasü, kong tapoktsü oset sünga yuja liasü, aser motorcycle anasai gari aruba mapang apok," ta yangji aliba ketdangsür Shamsullah-i osangbener dang ashi.

Iba region nung Shamsullah tenüng ya kanga bulua lir, aser pai iba lendong nung nisung asüba aser yiruba indang tejangja ashi. Asürtem ya iba tesem ajanga aor civilian tem liasü aser yirur alirtem ya timba police tem lir, shirnok gari nung liasü, ta pai ashi.

Lendong atalokba tesem nung tangokba noksatem nung

shishilempadak dokan kar kanga mejungi raksar aliba aser bomb apokdak temeket nung aliba ki kijiba raksar nguogo.

Chaman ya Pakistan aser Afghanistan tsüngta arrtsü ajanga senzüba tesem tongtipang ka lir, kong tetsüng agi senzür nisung miyirijang aika aser container truck tem anogoshi iba tesem ya ajanga senzür.

Chaman ya Balochistan province nung lir, koba Pakistan indang province tulutiba saka nütsüng yongsük tajemtiba lir, kong ali rongsen peria lir.

Iba tesem nung security tsütsü timtem jenti ajangshia arur, kong ethnic Baloch armed separatist movement temi küm ter dak tema sepai aser civilian dak tenük yoker lendong balala agüja arur, aser ano Tehreek-e-Taliban Pakistan (TTP, koba dang Pakistani Taliban ta ajar) telokia lendong kar agüja lir.

Mongulbarnü lendong ya onoki agütsüba lir, ta TTP odongtar Muhammad Khurasani-i sangdong ka ajanga tenüng agiogo.

Israel election: Netanyahu tarutsü jenjang mejangjateti lir

Jerusalem, Metsüremi/ March 24 (Agencies): Israel nung küm ana tsüngta parliamentary election pezübuba agiba indang exit polls sayaba sülen Ato Kilonser Benjamin Netanyahu-i linük nung maneni yimsü asütsü teimla kangabo mesayur.

Mongulbarnü election agiba sülen Israel nung TV channel tongti asema asadangba nung Netanyahu-isa takok angutsü ama asadangtet, kechiaser mapang ka pa indang defence minister

inyaksang, Naftali Bennett-i pa yaritsü akok, ta bilema liasü.

Saka ano tanaben asadangshiba nung Bennett-i yariaka menden 120 aliba parliament ya Netanyahu den tokteper aser pa busemer tsüngta kasa sadangtsü amai ajitet.

Linük nung lenir talangtiba inyaksang anema ochimashi ken o temai adoktsüba aser pai COVID-19 tashidak wara junga ketdang mesütet, ta aitsüba sülen exit polls nung opposition tem jenjang tajungba sayur.

Social media nungbo Netanyahu-i left-wing, centre aser rightist party madak takok nguogo, ta sangdong, saka TV projection nunga pa teimla mangur.

Election agiba aonung Likud rally ka nung pai takok anguba indang mejembi saka parliament nung menden 30 shi ngutetra, ibaji takok tulu asütsü aser right-wing sorkar ka tentettsü teimla lir, ta ashi.

Teloktep sorkar ka tentettsü asoshi tatongi marutetra, Israel nung ano election agishitsü.



Khu abenba rong ka Rotterdam leni aodang Suez Canal nung tekongi adoka iba tzü lenmang nung danga rong tem senzütsü mokoki kuma lir. Tonne 200,000 rong ya Temerem tzyüim nungi Mediterranean tzyüim leni aodang Mongulbarne 7:40 ako meta power supply nung timtem ajurua rekongleni adok, ta ashir. Iba container ship, Ever Green ya metong nung meter 400 (1,312 feet) talang, lenden nung meter 59 (193 feet) lir.

14 Assam Rifles-i Sewing machine agütsü



Dimapur, Metsüremi/March 24 (TYO): HQ 5 Sect. IGAR (N) Chieswema tawabangba nung 14 Assam Rifles-i, Op SADBHAVANA Project kübok Lotha Eloë Hoho (LEH), Wokha nem Automatic Stitch Machine pezü, Sewing machine stand pezü, sewing machine motor (with regulator) pezü, plastic menden pezü, stainless steel scissors pezü, measuring tailoring scale pezü, sung agi yangluba tailoring scale pezü,

hanger 20 aser drawer aketba table pongu agütsüogo. Item osettem ya 40 Assam Rifles Wokha battalioonn Deputy Commandant Dr. Robin Goyal-i 14 Assam Rifles tenüng nung March 24 nü Lotha Eloë Hoho office complex nung agüja liasü. Osettem agütsüba mapang Dr. Robin-i, tetsürtem tangar dak metaloker melidaktsüsü nükjidong nung machine tem agütsü, ta ashi. Paisa, Wokha district yimjung nung alitsü

atema Lotha Eloë Hoho-i teyari agütsüba atema parnok dang pelaba lemsatep aser ashiba agi, tang tashi nung battalion Wokha nung küm ka ser tesadang aliba mapang kecha timtem ajangshia mali ta ashi. Maneni pai parnok dang teyari agütsütsü mepeshiba den battalion-i takok tashi lokti ajungkettsü atema tetsürtem nem teyari agütsütsü nangzük. Kasa mapang nung Lotha Eloë Hoho, finance Secretary Thungchano Kikon-i, tetsürtem nem teyari tulu agütsüba atema Assam Rifles dang kanga pelaba lemsatepa liasü.

AR-i tenla tajung agütsüba atema tenüngsang agütsüba mapang Lotha Eloë Hoho mendenbulai, parnoki tetsürtem tangar dak memetaloki libaliro jenjang ajungkettsü atema training agütsütsü ta ashiba den iba ajanga tetsürtem aika taküm liyonga aotsü atema lenmang lapoktsütsü imlaba lemsatepa liasü.

Lamhainamdi nung nisung asem tepsetba T.R. Zeliang-i aitsü

Dimapur, Metsüremi/March 24 (TYO): Lamhainamdi nung ozüing alema inyaksangshirtemi tai maketba nisung asem taochi makai tepsetba osang angazüka ni kanga jashia mang ayimer, ta taoba CM T. R. Zeliang-i ashi. Ozüing raksar kari maneni prangbong amshiba sobaliba benshir, koba tanü lokti nung kecha jenjang maka aser teshisadangba shidak aliba lisopur ajaki aitsütsüla, ta paisa ashi.

Linük nung teti asoshi yimjung bener arutsü atema asenok ajak yongyatepba mapang asen lokti nung nisung kari iba maongka agia lokti-i magizüktetba inyakyimtem benshia nüburtem mulung nung maneni tetsübu aikdaktsür, ta Zeliang-i ashi.

March 22 nü tai maketba

takümtem tepsetba aser prangpong hadir teperi bener nisung telok kati aluyimertem amakba ajanga Naga nunger puti otsü menentsüogo. Iba ya tasütait inyakyim masü saka tasümaait inyakyim ka lir, shirnoki prangbong dak metaloker parnok ajangzüktsü atema aser tai maketba nisungtem temeden agintsütsü asoshi merangba maparen ka lir, ta paisa ashi

Maneni Zeliang-i ashiba agi, state sorkari iba ken o süoki ia agitsüla aser aibelena alirtem aitsütsü atema takok tashi inyaktsüla. Asen li nung alitsü atema amokmerenra asen lokti kechi akümtsü? Tebilemdangba aser tangatetba kecha masadangi prangbong hadir timba bener alirtem inyaksangshiji shidak kümduktsütsü asü?

Iba tatalokba ya kin, tamangba yimsü aser yimden yimsüsüba tsütsü tesendaktep ajak sentoka toktsür lisopur ajak atema lokti nung tangar dak metaloker alirtem inyaksangshi asadangshia asüngsashiba mapang ka asütsüla. Tangar amokmerenba aser prangbong amshia tashi sayuba sobaliba anema ajak longjemer nokdaktsü mapang tongogo, ta pai ashi.

Iba tatalokba ya ni khu khua aitsür. Kasa mapang nung ni asür Itinguangbe, Hangyi aser Asiambo nunger kinungertem den asükhu lemsateper. Tulusang Tsüngremi parnok kibongtem nem tashi aser anisüngzük agüjang ta sarasademtsür. Asürtem tanüla teti tatem makadak anisüngzükdakjang, ta T.R Zeliang-i ashi.

BLOCKS IDENTIFIED AS ASPIRATIONAL BLOCKS Sorkari Aspirational Blocks tem shimogo

Dimapur, Metsüremi/ March 24 (TYO): Nagaland sorkar sangdong ka ajanga

state nung Aspirational Blocks tem shimba sangdongogo.

Aspirational Blocks tem yamai alitsü:		
SI.No.	Aspirational Blocks	District
1	Mon	Tobu
2	Kohima	Tseminyu
3	Phek	Waziho
4	Mokokchung	Longchem
5	Peren	Terming
6	Dimapur	Aghunaqa
7	Wokha	Champang
8	Zunheboto	Satoi
9	Longleng	Sakshi
10	Noklak	Thonokyu
11	Tuensang	Chessore

Iba dak sendakba nung:
(1) Planning Department-i State jenjang nung Nodal Department ama inyaksangshitsü
(2) State jenjang nung Chief Secretary tekolak ser inyakyim balala benoka inyakba asadanga alitsü
(3) District jenjang nung District Level Committee, Deputy Commissioner

lenisüba kübok District Planning Officer, Member Secretary asütsü. DPDB-i tenüngdakba apir Aspirational Block Committee shimtsü
(4) District Level Aspirational Block Committee-i pei block atema küm pongu asoshi sentong yanglutsü aser parnok tinyaktsü rongnung CSS kübok

scheme densema bendenloker DPDB dangi temelaba agitsü asoshi abentsü.

- (5) District Level Aspirational Block Committee-i inyakyimtem ajak asadanga achaayangtsü
(6) Aspirational blocks sentong aser project tem ajak central aser state sentongtem kübok benoka inyaktsü. Ajisüaka senotsü talila nüngdakra Planning and Co-ordination Department-i iba khuret agizüka tenüngdakba apir Aspirational block ajak atema timba agi sen lakh 50 tashi agütsütsü.

Iba sentong ya Cabinet-i 2021 küm March 12 nü agizükogo, ta ketdangsür sangdong ka ajanga metetdaktsü.

MULUNG NEN O



LATE L. TAKUM LONGKUMER (Molungyimsen)
01.12.1939 - 20.03.2021

Onoki teti meima aliba Kinungbo aser Tsürabur, asür **L. TAKUM LONGKUMER** mapang tatsüka shiranga alidang kija, kibong arogo, yimten, kiyong-kinartem, medemertem lokti balala aser temeimer shirnokisa ozü den sarasadem, nübu, rongsen aser shsiatsü agi yaritepogo, nenok ajak dang ozü molung taroktiba nungi kanga pelaba lemsateper.

Tulusang Tsüngremi nenok ajak maneni moajang ta ozü sarasadem.

Temeim Kinungtsü, Jalatem, Semchir & Kinungertem.

Office of the

Longmisa Senso Mungdang

B.P.O Longmisa: P.O. Mokokchung, Nagaland

TEPELA LEMSATEPER

Watsü Akumchila Longmisa, 18th buba Ongpangkong Tetsür Mungdang Tir asütsü shimtet nung sensosanger ajaki kanga pelar aser tenüngsang agütsür. Ne wadang ajak nung Tsüngremi takok nung aniangma ta Mungdang sarasadem.

Sd/- Satemkaba Mendenbuba

Sd/- Alemchuba Tongti Zülur

CM Rio-i asükhu lemsatep

Dimapur, Metsüremi/ March 24 (TYO): March 23 nü Eden Medical Centre Dimapur nung S.I Jamir kinungtsü asür Temjentula asüba osang angazüka mang ayimba Nagalang Chief Minister Neiphiu Rio-i lemsatepogo.

Asür Temjentula ya kanga temulung tulu aser tesüngjem tetsür ka liasü. Maneni la ya temeim aketba kinungtsü, tetsü aser otsüla liasü, shibai tia tensa ajak nung lar kibong den nokdakogo. La ya tashi tait tetsür ka indang tatishitsü tajung ka lir, shibai ajem ajema lar kibong atema bendanga

agüja inyakogo. Yimden yimsüsür ka kinungtsü ama lai nüburtem ajangzüktsü asoshi mapa tajung aika inyakogo. Asenok ajaki la menongratsü saka la mapa tajungtem teti menungraa bilemtettsü, ta CM-isa ashi.

Mangyim tejashi mapang kinungtsü künati asür kibong den asükhu lemsateper aser iba tejashi khuret koktettsü atema lar kinungertem nem tashi aser tasü tait tanüla agüjang ta sarasademtsür. Asür tanüla teti tatem makadak anisüngzükdakjang ta sarasademtsür, ta Rio-isa lemsatep.

Mon DLCC senden menogo

Dimapur, Metsüremi/March 24 (TYO): National Tobacco Control Programme (NTCP) kübok District Level Coordination Committee (DLCC) Mon senden ka March 23 nü DC Conference Hall, Mon nung menogo.

Senden nung St. John's Higher Secondary School, Little Flower School, Christ King School aser Don Bosco Higher Secondary School Mon ya tobacco free institutions ta sangdongogo.

Moko achiba ajanga temang nung timtem bener arutsüba indang tangazükba agütsütsü asoshi sensaksemba mapang züngsemtemi mezüing Mon

District kübok Sub Divisions ajak nung aser iba sülen yimtsüngtem nung tangazükba agütsütsü lemtet. Senden nungsa NTCP takok ngua benoktsü atema sub divisions ajak nung committee tentettsütsü telemtetba agi.

Maneni district kübok school ajak tobacco free school akümtsü atema 2021 küm May ita 31 nü tashi mapang agütsütsü lemtet. Züngsemtemisa COPTA 2003 takok ngua benoktsü atema enforcement drives tali benoktsü mulungtepa liasü.

Iba senden ya DC Mon Thavaseelan K IAS lenisüba kübok agia liasü.

Chinky Yadav aser Tomar nati gold angu

New Delhi, Metsüremi/March 24 (Agencies): Chinky Yadav, shibai 2019 küm Doha nung 14buba Asian Championships nung tanabuba jenjang nguteta Olympic quota nguteter lir lai tang asayaa aliba ISSF shooting World Cup nung Bodhbarnü tetsür 25m pistol event kokogo.

Final asaya nung arishi küm 23 tain Yadav-i Sarnobat 4-3 agi koka liasü. Tena pronglai point 32 ngutetba sülen shoot-off nung Yadav-i takok angu.

Kasa mapang nung arishi küm 19 tain Bhaker-i bronze medal angu. Iba asaya nung temaba jenjang asemprongla India tsürtemi dang ngua liasü.

Parnok asemprongla Tokyo Olympics atema quota nguatokogo.

20 ben kashishiba sülen

ISSF WORLD CUP

Yadav-i point 14 nguteta la tejakdang liasü aser tanabuba jenjang nung Bhaker (13 point) liasü.

Iba sülen Bhopal nungi asayar yagi point 21 nguteta tanga asayartem dang nungi kanga agi tejakdang aküm. Sarnobat-ia ponglanglen aliba nungi anarongden atur final tongtet.

Final nung Yadav-i, target ponguprogla nung anaben kashi. Lai mezüngbuba competition stage tanabuba series aser elimination stage series trokbuba nung target pongu prongla nung kashia liasü.

Kasa mapang nung Sarnobat mezüngbuba stage tasembuba series nung target pong aliba nungi ponguprongla

nung kashi aser iba sülen pezü, tenet aser tekububa series nung target pezü nung asemben kashia liasü.

Tasembuba jenjang nung tembangla Bhaker-i series pezübuba nungdang target ponguprongla nung kashia liasü.

Kasa anogo Aishwary Pratap Singh Tomar-i, tebur 50m rifle 3 positions event nung gold medal nguogo.

Arishi küm 20 tain Bhopal nungi asayar yagi final nung point 462.5 nguteta Hungary nung nüngtugu asayar Istvan Peni (461.6) aser Denmark nung asayar Steffen Olsen (450.9) madak takok angu.

Final nung India nung asayartem rongnung asayar tejen Sanjeev Rajput aser Niraj Kumar nata asaya aser tena jenjang trok aser tibuba nung tembang.

India-i Shooter tem dak tamang akar: Kiren Rijiju

New Delhi, Metsüremi/March 24 (Agencies): Sports Minister Kiren Rijiju-i Bodhbarnü, Tokyo Olympics nung India nung shooter temi takok tajung angutsü imlar ta ashi. Paisa, tang asayaa aliba ISSF World Cup nung asayartemi kanga junga asayaba sülen pai parnok dak tali tamang akar, ta ashi.

Dr Karni Singh Shooting Range nung tang asayaa aliba iba asayamung nung India temaba jenjang nung lir aser India team-i tang tashi nung gold 9, silver 5 aser bronze 5 kokteta ajak senteper medal 19 koker lir.

"Olympics nung shooter temi takok tajung angutsü kanga imlar. Parnoki mapang talangka kanga junga asayaa arudar aser iba ajanga timla tali agütsür," ta Rijiju-i ashi.

"Parnok tenüngdakbatem peritsütsü atema sorkari akokba tashi jenjang balala agia arudar," ta paisa shisem.

Tetsür 25m pistol finals nung Chinky Yadav (gold),

Rahi Sarnobat (silver) aser Manu Bhaker (bronze aser) tebur 50m rifle 3 positions event nung Aishwary Pratap Singh Tomar-i gold anguba ajanga India-i iba asayamung amokbanger asayaba sayur.

Rijiju-i Bodhbarnü asayamung asayaa aliba tesem semdang aser tetsür 25m pistol finals tembangba sülen asayamung broadcaster Sony Liv den sensaksema liasü.

Taoba ita Rijiju-i, World Cup atema quarantine mapang tajemba kümdaktsütsü ta metetdaktsü. Bendanglen nungi arua iba asayamung nung shilem agitsüpurtem tezü medangdaktsütsü atema iba jenjang agitsü lemtet.

Asayamung masaya tsüngda ita ka tejakdang, ministry dang shooter tem anogo 14 quarantine mesüdaktsütsü aser bendanger asayartem nem kanga tongibang süa vaccine agütsütsü mepeshia liasü.

Iba asayamung nung linük 53 nungi asayar 294-i shilem agidar.

36buba PDSA asayamung osang

Kohima, Metsüremi/March 24 (TYO): 36buba Phek District Sports Association (PDSA) meet Phek district kübok Thenyizu yimtsüng nung tanü agi anogo anabuba asayaago.

Tanü high jump asaya nung Chokri Area Games & Sports Association (CAGSA) nungi Eto Kezo-i gold angu aser CAGSA nungi Rüvezo Rose-i silver aser Phek Area Sports Association (PASA) nungi Luzio Venuh aser Centre Chakhesang Sports Association (CCSA) nungi Küzhonu Vadeo nati bronze angu.

Triple jump asaya nung CCSA nungi Kukhalhu Nienu-i gold aser CCSA nungi Nuvezo Sakhamo aser PASA nungi Poshezo Chizo nati silver aser bronze angu.

Tebur long jump asaya nung CAGSA nungi Acuzo Tetseo-i gold, CCSA nungi Kropa Ruho-i silver aser CASA nungi Velhüto Ringa-i Bronze angu.



Tetsür Long Jump asaya nung Kuzhopolu Medeo-i (CAGSA) gold, Choyivelu Nienu (PASA)-i silver aser Muletalu Tetseo (CAGSA)-i bronze angu.

Kasa mapang nung mezüngbuba tebur basketball semi-final asaya CAGSA aser KKTSA na March 25 nü asayatsü aser tanabuba semi-

final asaya PASA o SASA na asayatsü.

Tetsür basketball asaya nung PASA o SASA na mezüngbuba semifinal aser CAGSA o CCSA na tanabuba semi asayatsü. Tebur volleyball mezüngbuba semi nung CASA-i TASA akok aser PASA-i CCSA aser Secheku ASA-i KKSA kokogo.

Osaka Stuttgart WTA Clay-court Event nung masayatsü

Metsüremi/March 24, 2021 (Agencies): Japan tsür world number two Naomi Osaka-i, taruba ita Stuttgart nung asayatsü aliba WTA clay-court asayamung nung shilem magitsü atema telemtetba agiogo, ta asayamung ayongertemi metetdaktsü.

"Naomi Osaka European clay court season May ita nungiang tenzüksü," ta Stuttgart asayamung ayongertemi metetdaktsü.

South-west Germany nung April 17 nungi 25 tashi

asayatsü aliba asayamung ya terpranger mendeni asayatsü renema lir. Covid-19 wara pokteter aliba ajanga iba jenjang agitsüsa akümer.

Roland Garros nung French Open masaya tsüngda iba asayamung ya Europe nung mezüngbuba clay-court nung asayaba asayamungasütsü. French Open ya May 23 nü tenzüksü.

Osaka-i 2021 küm atema mezüngbuba Grand Slam kokogo. Australian Open final nung lai USA tsür Jennifer Brady koka liasü.

Iba asayamung nung Osaka masayaka tetsür asayartem rongnungi top ten nung aliba asayar teneti shilem agitsü imlar, kong Australia tsür world number one Ashleigh Barty densema lir.

Kasa mapang nung defending champion Petra Kvitova, top-ten nung asayar Simona Halep, Sofia Kenin, Elina Svitolina, Aryna Sabalenka aser 2018 küm Stuttgart asayamung koker alila Karolina Pliskova nungeri iba asayamung nung shilem agitsü imlar.

Saina, Srikanth takok nung tenzükogo

ORLEANS MASTERS

Metsüremi/March 24, 2021 (Agencies): Bodhbarnü Paris nung Orleans Masters asayamung mezüngbuba round nung London Olympics bronze medallist Saina Nehwal-i tetsür kija asaya nung Ireland tsür Rachael Darragh kokogo.

Saina shiba Olympics nung pezübenbuba asayatsü atema ranking points arishiba mapang ka lir, lai minute 21 nung dang Rachael 21-9 21-5 agi koka taruba round nung France tsür Marie Batomene den asayatsü jangjaogo.

Saina, taoba hopta temola yiruba sülen All England Open Championships mezüngbuba round nung tuguatok.

Kasa mapang nung India nung asayar Kidambi Srikanth-ia 21-15 21-10 agi külem India nung asayar Ajay Jayaram minute 25 nung koka tasembuba round tongogo.

Mezüngbuba round nung Srikanth bye angu aser Ajay-i 19-21 23-21 21-16 agi külem India nung asayar Alap

Mishra koka liasü.

Tarep temeyoktep asaya nung Pranaav Jerry Chopra aser N Sikki Reddy nati Austria nung tarep Dominik Stipsits aser Serena Au Yeong na 21-7 21-18 agi kokogo. Tena taruba asaya Denmark nung tarep Niclas Nohr aser Amalie Magelund na den asayatsü jangjaogo.

Ira Sharma, shiba tetsür kija asaya qualification nungi main draw-i aniketa liasü, lai France tsür Leonice Huet 12-21 21-14 21-17 agi kokogo aser la taruba asaya Bulgaria tsür Mariya Mitsova den asayatsü.

Mongolbarnü India nung asayar Kiran George-i, Netherlands nung asayar Mark Caljouw 13-21 21-18 22-20 kokogo, shiba taoba hopta All England Championships semifinal tonga asayaago.

Maneni Mithun Manjunath-i France nung asayar Lucas Claerhout 21-14 21-10 agi akok, ajisüaka Subhankar Dey-i, mezüngbuba round nung 17-21 13-21 agi Denmark nung asayar Ditlev Jaeger Holm makok.

BILEMDANGANG

"Artsüba kija agi ken o mebenteter; angatetdaktsütsü kanga tongtibang."